

Manaivel al pievel e puncts culminants

La mesiraziun uffiziala svizra ha festivà l'onn 2012 ses giubileum da 100 onns

■ (cc) In puzzle enorm amez la piazza federala a Berna, occurrenzas en tut ils chantuns, ina marca postala speziala, ina publicaziun festiva – l'onn 2012 è la mesiraziun uffiziala svizra stada en il vair senn dal pled il punct central. Igl è vegnì festivà il giubileum da 100 onns da questa instituziun. Sch'ina dama pli passada survegn 100 onns vegnì festivà. Uschia er sch'i sa tracta da la mesiraziun uffiziala. Ma tgi che crai ussa che questa instituziun saja vegnida en ils onns sa sbaglia. En ses onn da giubileum è ella sa mussada moderna e frestga sco anc mai. La publicitad ha adina puspè gì la chaschun da vegnir en contact cun il tema mesiraziun e la populaziun svizra ha savens fatg diever da questa pussaivladad.

Cun ina festa populara bain visitada è l'onn da giubileum vegnì avert il cumenzament da matg sin la piazza federala a Berna. Davant la chasa federala ed en preschientscha da blera glieud mirvegliusa è vegnì mess ensemen il puzzle il pli grond da la Svizra. In'exposiziun da giubileum ha infurmà davart las incumbensas e la moda da lavar da la mesiraziun uffiziala.

Mez matg è lura vegnì festivà en tut la Svizra il «Di da la mesiraziun uffiziala» sut il motto «punct central»: Posts spezialisads chantunals da mesiraziun e numerus biros privats d'inschigner geometras e d'inschigners geometers han organisà las occurrenzas las pli differentas en il rom dal giubileum.

En il chantun Grischun han l'Uniun d'inschigner geometras e d'inschigners geometers dal Grischun (IGGR), la federaziun professiunala Geosuisse, secziun Grischun, e l'uffizi d'agricultura e da geoinfurmaziun organisà e realisà il matg a Cuira, en il rom da la fiera da primavera Higa, in'exposiziun speziala davart la mesiraziun uffiziala. Uschia han bleras visitadoras e blers visitaders pudì sa far in malletg dal mintgadi da mesiraziun e dals



L'onn 2012 è la mesiraziun uffiziala svizra stada en il vair senn dal pled il punct central. Igl è vegnì festivà il giubileum da 100 onns «mesiraziun uffiziala svizra».

FOTO O. ITEM

products da la mesiraziun uffiziala. Plinavant han ins pudì admirar il center geografic dal Grischun, il Crap Furò, sin in model tridimensiunal dal Parc Ela. Il november, a chaschun d'ina segunda occurrenza en il rom da l'exposiziun professiunala Fiutscher a Cuira, è vegnida preschentada spezialmain als giuvenils la professiun da la geomatrica resp. dal geomaticher. Tuttas duas occurrenzas èn vegnidas visitadas da blera glieud e cun grond interess.

Regurdientschas restantas èn la marca postala speziala, che la Posta svizra ha edì per l'onn da giubileum, e plinavant ina publicaziun festiva da 144 paginas.

Shop da giubileum

Il puzzle da giubileum (100 u 1000 tocs), la publicaziun festiva ed ulteriurs artitgels pon vegnir empustads, fin che

la provisiun tanscha, en il shop da giubileum sut www.cadastre.ch/2012. La marca postala speziala «100 onns mesiraziun uffiziala» po vegnir cumprada tar la Posta svizra u online sut www.post.ch/philashop (Ausgabe vom 9.5.2012 > 100 Jahre Amtliche Vermessung).

La mesiraziun uffiziala en Svizra

Dapi l'onn 1912 è la mesiraziun uffiziala in pilaster principal dal sistem giuridic svizzer. Ella documentescha a tgi ch'in bain immobigliar appartegna, definescha ils cunfins, ils lieus dals edifizis, ma er ils curs dals auals u ils urs dals gauds. Cun la protecziun da la proprietad funsila furnescha ella ina contribuziun impurtanta per la segirezza giuridica e per il bainstar en noss pajais. Purtada vegn la mesiraziun uffiziala da la confederaziun, dals chan-

tuns e da las vischnancas. Realisada vegn ella da persunas privatas e per part er d'uffizis da mesiraziun communalas. Per ulteriuras infurmaziuns visitai per plaschair www.cadastre.ch.

L'organisaziun dal project

Il giubileum da 100 onns è vegnì purtà dals suandants partenaris: Direcziun federala da mesiraziun (Uffizi federal da topografia swisstopo), Conferenza dals uffizis chantunals da mesiraziun CUCM, inschigners geometers svizzers IGS, Societad svizra da geomatrica da gestiun dal territori geosuisse, gruppa professiunala dals inschigners da geomatrica Svizra Geo+Ing (avant gruppa professiunala da mesiraziun e geoinfurmaziun FVG e groupement des ingénieurs en géomatique GIG) e professiunists da geomatrica Svizra (PGS).